



Иоанның ікінші пічии

Пу пічік «Худай таллаан абахайға паза аның палаларына» тіп адал парған. Иди Христос тигірибі паза аның араласчылары чайыдып адал парғаннар. Пічіктің авторы Иоанн илчі позын ах сағал тіп адапча. Анзы аның аарласнаң тузаланчатханын паза пічігін адап ысчатхан тигірибнің араласчыларының полғанының на үчүн нандырығ тутчатханын көзітче.

Пастағы пічииндөк чіли, Иоанн хығырығчыларын сынға тудынып паза хынызып чуртирға үгретче. Ол идөк Иисус Христос толдыразынан кізі полғанынаң чараспинчатхан чой үгредігден китенерге сурынча.

1 Мин, Ах сағал^c, Худай таллап алған Ічее* паза аның палаларына чолабит ысчам. Мин сірерге сыннаң хынчам, мин не нимес, че Сынны пілчеткен прай кізілер сірерге хынчалар. ²Ол Сын пісте паза піснең хада хачан даа полар. ³Худай Пабадан паза Хан-пигібіс^c Иисус Христостан, Пабаның Оолғынаң, паарсас, өлчей паза амыр хоных сірерге ползын. Прай пу нимелер сында даа, хыныста даа сірернең хада ползыннар.

⁴Синің палаларының аразында, Худай Пабаның піске пирген чахиин толдырып, сынға хынып чуртапчатханнарны тапханыма тың өрін парғам. ⁵Мин сағаа, Ічее, наа чыхығданаң нимес, че піске пастабох пирілген иргі чыхығданаң пасчам. Сағам мин, прайзыбыс удур-төдір хынызааңар тіп, синнең сурынчам. ⁶⁻⁷Хыныс, тізең, – Худайның чыхығларын толдырары. Иисус Христостың кізі польп килгеніне киртінмин, чонны алаахтырчатханнар чойлар паза антихристтер^c прай чир үстүне тарап парғаннар.

* 1:1 «Іче паза палалар» теени мында тигірибні паза Худайға киртінчеткенерні таныхтапчалар.

Оларның тарап парғаннары үчүн, Христосха киртініп пастаан тустох сіерге пірілген хыныстаңар чахығны толдырып, чуртирға кирексер.

⁸Ниме үчүн тоғынғабыс, аны чідірбин, Худайның сыйиин прай алып алар үчүн, постарыңны сиргек тудыныңар. ⁹Христостың үгредиин толдырбин, аны пос ондайынча алыстырчатхан кізі Худайға киртінминче. Христостың үгредиин толдырчатхан кізіде, тізең, Паба даа, Оолғы даа пар. ¹⁰Піреезі, сірерзер киліп, пу үгредігні сіерге читірбезе, аны тураа кирбенеңер, изен-неспенеңер дее аннаң. ¹¹Аннаң изеннесчеткен кізі аның иткен хомай киректерінде араласча нооза.

¹²Сіерге пасчаң көп нимелерім пар, че ол нимелерні чачында черниланаң тооза пазарға хынминчам. Өріністерің толдыра ползын тіп, сірерзер киліп, көстең көске чоохтазып аларыма ізенчем.

¹³Худай таллап алған пиченнің палалары сағаа чолабит читірчелер. Аминь^с.